

Naqqiut

Siunnersuut 6. august 2021-meersoq taarserpaa
(Naqinnerliukkat naqqiutigineqarput)

Uunga siunnersuut: Inissianik attartortitsisarneq pillugu Inatsisartut peqqussutaata allanngortinneqarnera pillugu Inatsisartut inatsisaat nr. xx, xx. xxx 2021-meersoq
(Attartornermi akiligassap akilerneqarfissaa, inissianik attartortittakkaniq oqoqalersimasunik nalunaarsuineq kiisalu suliffimmut atatillugu inissianik oqoqarsimasunik innersuunneqartunik itigartitsisinnaatitaaneq)

§ 1

Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi, kingullermik Ilinniartut ineqarfii pillugit inatsisartut inatsisaanni nr. 42-mi, 12. december 2019-imeersumi § 50 aqutigalugu allanngortinneqartumi tulliuttut allanngortinneqassapput:

1. § 20-p kingorna ilanngunneqassaaq:

” **§ 20 a.** § 20-mi, imm. 1-imi allassimasut apeqqutaatinnagit, inissiat ukiut kingulliit tallimat iluini oqoqarsimasutut attartortitsisup nalunaarsuiffianni inissiaq allassimappat, atorfilik sulisunut inissiamik innersuunneqartumik itigartitsisinnaavoq, takuuk § 32 a, taamaaliornerminilu sulisunut inissiamik innersuunneqarsinnaatitaanini, inissinneqarallarnermi ajunngitsorsiassaqarsinnaatitaanini imaluunniit sulisitsisup akiligaanik inissinneqarallarnerminik ingerlatsiinnarsinnaatitaanini annaassanngilaa.”

2. § 32-p kingorna immikkoortumi “Namminersornerullutik Oqartussat kommunellu inissiaataat attartortittakkat”-mi ilanngunneqassaaq:

” **§ 32 a.** Namminersorlutik Oqartussat imaluunniit kommunit inissiaataat attartortittakkat, ukiut tallimat kingulliit iluini oqoqarsimasut nalunaarsorneqassapput. Inissiaq qaqpukkut oqoqarsimanersoq, qanoq annertutigisumik oqoqarsimanersoq, oquiaanerlu pillugit attartortitsisoq nalunaarsuissaq.

Imm. 2. Oquk patsisaalluni inissiaq attartortittagaq nutarterneqarsimappat, inissiarlu attuumassuteqanngitsumit paasisimasalimmilli misissuinikkut oqoqarunnaarsimasutut upernarsarneqarsimappat, imm. 1 naapertorlugu nalunaarsuinissaq pinngitsoortinneqarsinnaavoq. Inissiaq oqoqarunnaarsimasoq misissuinerup upernarsassavaa.

Imm. 3. Nalunaarsuinissaq pillugu, matumani inissiat attartortittakkat sulisunut inissiatut atorneqartut kisimik nalunaarsorneqarnissaat kiisalu inissiat attortittakkat

annertugisassaanngitsumik oqoqartut nalunaarsorneqartariaqannginnerat ilanngullugit, Naalakkersuisut malittarisassanik aalajangersaasinnaapput.

§ 32 b. §§ 11, 12, 15, 16, 17-ili innersuussutigalugit atorfillip sulisunut inissiaq § 32 a naapertorlugu nalunaarsorneqarsimalluni Namminersorlutik Oqartussanit imaluunniit kommunimit pigineqarluni innersuunneqartoq tigujumanngippagu, Namminersorlutik Oqartussat imaluunniit kommuni najugaqarfimmut ingerlatsinermut tapiissuteqassaaq. Inissiaq attartortittagaq allamut attartortinneqarsinnaanngippat ingerlatsinermi tapiissutit tunniunneqassapput, tamatumalu kingunerisaanik najugaqarfiup amigartoorutit ingerlatsinermut missingersuutini matussusersinnaassavai. Atuineq ilanngunnagu qaammammut attartornermi akiligassaq, ingerlatsinermi tapiissutit naleqqatigissavai. Ukiumut ataasiarluni ingerlatsinermut tapiissuteqartoqarsinnaavoq, inissiamullu ataatsimut annerpaamik pingasoriarluni ingerlatsinermut tapiissuteqartoqarsinnaalluni.”

3. § 38 tulliuttutut oqaasertalerneqassaaq:

” **§ 38.** Attartortoq pisussaavoq ineqarnermut, imermut kiassarnermullu akiligassanik, attartornermut isumaqtigiissummi aalajangersarneqartumi akiliinissamut piffissaq eqqorlugu akiliisassalluni.

Imm. 2. Attartornissamut isumaqtigiissummi allatut aalajangersagaqanngippat ineqarnermut, imermut kiassarnermullu qaammammi pineqartumi akiligassat qaammatip naanerani aningaaseriviit ulloq kingulleq ammasarfiini qaammammut siumoortumik akilerneqartassapput. Ineqarnermut, imermut, kiassarnermullu akiligassat qaammammut naatsorsorneqaratik piffissamut allamut akilerneqartussatut naatsorsorneqartut, aningaaseriviit ulloq kingulleq ammasarfiini piffissamut pineqartumut siumoortumik akilerneqartassapput. Piffissaagallartillugu akiliineq, ullormi akiliiffissatut kingullermi kingusinnerpaamik akiliisoqartassaaq.

Imm. 3. Attartortitsisoq akiliiffissamik akileeriaasisamillu innersuussissaaq. Aningaaserivikkut akiliineq akiliiffissatut innersuunneqartumut akiliinertut isigineqassaaq. Akiliiffissamik innersuussisoqarsimannngippat ineqarnermut akiliut attartortitsisup niuernermik ingerlataqarfianut imaluunniit attartortitsisoq avataaniit aqutsisumik atuippat, taassuma niuernikkut ingerlataqarfianut akilerneqassaaq.”

4. Inatsimmi tamarmiusumi “Naalakkersuisut” “Naalakkersuisut”-nut, “Naalakkersuisut” “Naalakkersuisut”-nut, ”Naalakkersuisuni ilaasortanut pisortanullu inissiat” ”Naalakkersuisuni ilaasortanut aamma Naalakkersuisoqarfinni pisortanut inissiat”-nut aamma ”Naalakkersuisuni ilaasortat aamma Naalakkersuisoqarfinni ataasiakkaani pisortat” ”Naalakkersuisuni ilaasortat aamma Naalakkersuisoqarfinni pisortat”-nut allanngortinneqassapput. Aamma inatsimmi tamarmiusumi “Namminersornerullutik Oqartussat” ”Namminersorlutik Oqartussat”-nut, ”Namminersornerullutik Oqartussat”

“Namminersorlutik Oqartussat”-nut, “Namminersornerullutik Oqartussanit pigineqartut”
“Namminersorlutik Oqartussanit pigineqartut”-nut, “Inatsisartut” “Inatsisartut”-nut,
“Inatsisartut aningasaqaqarnermut inatsisaat” “ningasaqaqarnermut inatsit”-mut aamma
“Inatsisartut aningasaqaqarnermut inatsisai” “ningasaqaqarnermut inatsisit”-nut
allanngortinneqassapput.

§ 2

Inatsisartut inatsisaat 2022-mi januaarip aallaqqataani atuutilissaq.

*Imm. 2. § 1, nr. 1-ip aamma nr. 2-p atuutilerfissai, nalunaarutikkut Naalakkersuisut
aalajangersassavaat.*

Namminersorlutik Oqartussat, ulloq xx. xxx 2021

Múte Bourup Egede